

Segun Freddy Refunjol:

Reunion na Tanki Flip cancela debi cu pakete di informacion ta incompleto

ORANJESTAD(AAN): -- E reunion entre informador Henny Eman y e comision di MEP encarga cu sinta na mesa cu informador, no a bay door ayera.

Esaki pa motibo cu e comision no a haya tur informacion cu el a pidi señor Eman pe riba nan prome encuentro riba 23 di December

aña pasa.

Antayera, e comision di MEP a manda informador Eman un carta den cual ta bise cu falta varios documento den e pakete di informacion cu el a ricibi.

Den e carta pa informador Eman, a inclui un bijlage cu mas o menos binti punto riba cual e comision no a haya

contesta.

Den un entrevista cu DIARIO, voorzitter di e comision di MEP Freddy Refunjol ta bisa cu falta entre otro, informacion tocante e Concept Jaarrekening pa aña 1995-1996, incluso e raport di CAD (Centrale Accountantsdienst) y di Algemene Rekenkamer pa e añanan aki.

Tampoco e comision a haya contesta riba e asunto di e coordinadornan y encuanto uso di consultantnan durante e periodo di gobernacion.

Mas leu, e voorzitter ta bisa cu e comision falta documentonan tocante e situacion di turismo na Aruba.

Riba Diamars-anochi, e comision a haya e carta di contesta di señor Eman, caminda e ta muestra comprension pa e puntanan cu MEP a trece pa dilanti.

Señor Refunjol no tabata por a bisa ki dia e reunion entre informador Eman y e comision di MEP lo tuma lugar awor.

Despues cu e comision haya e documentonan completo, e lo mester repasa nan y djey reuni cu Consejo di Partido Extraordinario di MEP.

E reunionnan cu Consejo di Partido Extraordinario ta dura un pa dos dia loke ta indica cu probablemente e reunion cu informador lo no bay door e siman aki mas.

Segun señor Refunjol, e ambiente rond di e contacto entre e comision di MEP y informador Eman ta formal.

E ta bisa cu pa MEP, e asunto aki ta serio.

Pa e partido geel pensa na drenta negociacionnan tocante formacion di un Gobierno nobo, ta necesario pa e haya informacion tocante e situacion na Aruba.

MEP tin entendi cu e situacion ta dificil pero mester di informacion completo pa por pone tur cos riba un rij.

Na fin di December, informador a reuni pa prome biaha cu e comision di MEP na Kazerne di Bombero na Tanki Flip.

Durante e reunion aki, e comision a pidi pa informacion specifico tocante varios topico, di cual esun di mas importante tabata finanzas publico.

Riba Diasabra y Diabierna ultimo, MEP a haya parti di e documentonan cu el a pidi pe y e comision a repasa e informacion.

Riba Dialuna, fraction di MEP a reuni tocante e informacion haya y riba Diamars, e comision a reuni cu Consejo Extraordinario di MEP.

Emisora a bay for di aire...

Top-FM a sufri daño enorme debi na fayo di coriente

ORANJESTAD(AAN) Ayera merdia e emisora popular na TOP FM 95 a haya un fayo di coriente cu a causa daño enorme y debi na e fayo di coriente di Elmar, transmisionnan di e emisora a bay for di aire.

Tabata pa mas o menos 20 minuut pa uno, net ora cu e noticia cayente encuanto formacion di gobierno tabata topico di e noticiero di merdia, cu diripiente henter e bario caminda TOP FM 95 ta situa, a haya problema cu sumministracion di coriente.

Despues di un ora y mey coriente a bolbe y no ta conoci si ta ora cu e emisora a haya coriente di nobo ayera, cu e daño a ser causa, pero hecho ta cu e emisora a keda for di aire debi cu e sound procesor un aparato necesario pa por transmiti a dañu.

Ta trata aki di un aparato esencial cu ta regula e sonido cu ta ser transmiti y sin e aparato aki e sonido ta sali masha malo mes.

Ayera anochi ainda tecniconan di TOP FM 95 tabata trahando duro pa tog bay den aire, cual nan a logra tambe, pero calidad di e sonido no tabata mucho cos di gaba.

Kizas awe anochi nan por logra di trece e emisora bek den aire cu un zonido bon regula.

Oyentenan di TOP FM 95 a rabia formal ayera ora cu nan a nota cu e noticiero na un forma abrupto a bay for di aire y nan tabata yama pa loco pa haya sa kico a pasa.

Tabata tin oyentenan cu a kere cu un acto di sabotage lo a tuma lugar contra e emisora pasobra durante cu campaña di eleccion ultimo tabata den full swing, actonan di sabotage tambe a tuma lugar, pero malechornan lo a hit instalacionnan di un otro emisora keriendo cu tabata trata

di instalacionnan di TOP FM 95.

Henter e vecindario caminda TOP FM ta situa tambe doña a keda sin coriente.

Ken ta bay paga TOP FM 95 e daño y gastonan cu a surgi debi na e fayo di coriente cu segun informacionnan cu DIARIO a haya no tabata debi na falta di TOP FM.

Elmar ta bolbe laba man y asina pa di tantisimo biaha laga hende atras cu daño causa via e red di distribucion

di coriente na Aruba?

No mucho tempo pasa tambe doña di un negoshi a lanta caso contra Elmar pa motibo di fayo di coriente a pone cu su negoshi a sufrí daño grandi pasobra tur sorto di aparato a kima.

No ta conoci ainda kico gerencia di TOP FM lo bay haci, si nan lo bay lanta caso contra Elmar pa asina haya gastonan y dañonan cu nan a sufrí paga, pero un hende mester bay para responsabel pa loke a pasa ayera.

PAKETE DI SPIRITO!!

